



Komunikadu Imprensa **Dili, 18 Feveiru 2019**

Diretór eskola husu ba estudante sira ne'ebé partisipa iha treinamentu atu transmite informasan ba kolega sira ne'ebé la hetan oportunidade

Iha 16 Feveiru 2019, JSMP liuhosi Unidade Advokasia no Treinamentu realiza treinamentu ba estudante decimo ano iha eskola Sekundaria Públiku Nu. 1 Suai, Sub-distritu Suai Vila, Distritu Covalima. Estudante sira ne'ebé partisipa iha treinamentu ne'e hamutuk ema nian 30, ne'ebé kompostu hosi feto nain 15 no mane nain 15. Estudante sira ne'e hili hosi turma 6, no kada turma reprezenta ema nain 5.

"JSMP fiar katak ho treinamentu ne'e, sei fasilita estudante sira hodi hatene sira nia direitu, prosesu sira ne'ebé envolve labarik konfliktu ho lei no útiliza sistema justisa formál kuandu ema ruma viola sira nia direitu ka labarik seluk nia direitu iha familia, eskola no ka iha sosiedade", dehan Diretór ezekutivu JSMP Luis de Oliveira Sampaio.

Treinamentu ne'e, hanesn atividade kontinuasaun hosi JSMP ne'ebé apoia hosi Embaixada Canada. Antes ne'e JSMP mós fasilita ona treinamentu sira balun iha tinan 2018 no inisiu tinan 2019 ba estudante sira iha Distritu Bobonaro, Baucau, Oekuse no ikus liu iha Distritu Covalima.

Treinamentu ne'e ho objetivu atu hasae koñesementu estudante sira nian kona-ba direitu labarik, asesu ba sistema justisa formál no motiva estudante sira atu hili fakuldade diretiu iha universizada karik aban bain-rua sira remata eskola sekundária.

Iha abertura Diretór Eskola Sekundária Públiku Nú. 1 Suai Sr. Francelino F. de Carvalho husu ba estudante sira ne'ebé partisipa iha treinamentu ne'e, atu fó antensaun másimu nune'e bele sai fali ajente hodi kontinua transmite informasaun sira ne'ebé hetan ona hosi JSMP ba estudante rihun ida resin ne'ebé lahetan oportunidade husi treinamentu ne'e.

Nia hatutan katak partisipante sira ne'ebé partisipa iha treinamentu ne'e maioria idade kiik, husi 17 mai kraik. Tanba ne'e treinamentu ne'e diak tebes ba sira no husu partisipante sira atu fó antensaun sériu nune'e bele hatene didiak materia importante sira ne'ebé espesifikamente koalia kona-ba direitu labarik no oinsa atu prosesu tuir justisa formal, bainhira iha prosesu aprendisazen profesór/a sira ka kolega ruma prátika ka komete aktu violénsia hasoru labarik sira.

Treinamentu ne'e hetan partisipasaun másimu hosi estudante sira, no partisipante sira hato'o sira nia preokupasaun kona-ba responsabilidade inan-aman ba menór no responsabilidade edukadór

(proferor/a) sira nian ba estudante no oinsa atu asesu ba sistema justisa formal kuandu inan aman ka proferór/a sira halo violénsia hasoru sira.

Hatan ba preokupasaun sira ne'e, JSMP klarifika no esplika katak tuir inan-aman, sosiedade no estadu iha obrigasaun atu fó protesaun espesifiku ba labarik sira. Konsituisaun Timor-Leste Konvensaun Direitu Labarik ne'ebé Estadu Timor-Leste ratifika ona hatuur obrigasaun lubuk ida ba estadu nu'udar Estadu-Parte atu kumpri obrigasaun hodi asegura katak labarik sira hetan assistensia no protesaun ne'ebé adekuaudu tanba fizikamente no emosioálmente labarik sira seidauk maduru, seidauk iha kapasidade atu hola desizaun no seidauk bele proteze sira nia-an. Inan-aman iha obrigasaun atu hakiak, fó alimentasaun, tau-matan, kuidadu, proteze hosi risku, la-halo diskriminasaun. Entretantu responsabilidade profesór/a hanesan edukadór, tenki eduka, kuidadu no proteze labarik sira durante labarik sira halo hela aprendizazen iha eskola no fo oportunidade atu labarik sira dezemvolve-an tuir sira nia kapasidade.

Kestaun kona-ba inan-aman halo violénsia hasoru nia oan sira no ka profesór/a sira halo violénsia hasoru estudante sira, JSMP esplika katak inan-aman, ka família uma laran, ne'ebé halo violénsia hasoru labarik sira, sei hatan ba krime sira tuir mai: krime ofensa ba integridade fízika simples iha artigu 145 Kódigu Penál (KP) konjuga ho artigu 2, 3 no 35 Lei Kontra Violénsia Doméstika (LKVD), krime maus tratus ba menór iha artigu 155 KP, krime interupsaun ba gravidéz iha artigu 141 KP, krime infantisídiu iha artigu 142 KP. Ekuantu se krime ho natureza seksuál arguidu sei prosesu ho krime abuzu seksuál ba menór iha artigu 177 KP, krime koasaun seksuál ho agravaasaun iha artigu 171 KP konjuga ho artigu 173 alinea (d) KP, krime violasaun ho agravaasaun iha artigu 172 KP konjuga ho artigu 173 alinea (d) KP, krime prostituisaun infantil 175 KP, krime pronografia infantil iha artigu 176 KP, krime aktu seksuál ho adolexente iha artigu 178 no krime la halo tuir obrigasaun alimentár iha artigu 225 KP.

Krime sira iha leten nu'udar krime públiku eseptu krime la halo tuir obrigasaun alimentár iha artigu 225 KP, krime sira ne'e karik komete hosi membru familia, nia prosedumentu la depende keixa, kualker ema ruma mak hetan bele hato'o denunsia ba polísia ka Ministériu Públiku.

Treinamentu ne'e lao ho diak teb-tebes no partisipantes sira mós ativu husu perguntas no fahe sira nia esperensia moris iha família no eskola. Treinamentu ne'e realiza tanba hetan apoiu finanseiru hosi Embaixada Canada, Jakarta-Indonezia.

Atu hetan informasaun liutan favor kontaktu direitamente:

Luis de Oliveira Sampaio
Diretór Ezekutivu JSMP
Diresaun e-mail: luis@jsmp.tl
www.jsmp.tl
Telefone: 3323883 | 77295795